



OONKUNDATHANA DHAANGOLA NA SA KADHI SITHA OMUNTU UUNYE

Ayehe Angola, Cuba na SA oya tala esiku lyaSeptemba 29 nuumvo li shi okuningwa etameko lyomalongekidho gehulithopo lyiita mbyoka ya vundu ngaashingeyi muumbugantu waAfrika oomvula 13 dha zi ko, osho omumbisofi Dumeni a galuka neuvito ndyoka molweendo lwiiwike iyali muAfrika.

Omumbisofi Dumeni okwa yile kuEtiopia, pehulilo lyomwedhi gwa zi ko, shi na sha noshigongi shEwilikongundu lyOngongahangano yAakwaluther muuyuni, moka e li oshilyo.

Olweendo olwa li lwi itsu kumwe noonkundathana dhoshikondo oshitatu muCairo sha-Egipiti omolwemanguluko lyaNamibia nehulithopo lyiita yopashigwana muAngola.

Monkundathana ndhoka ongundu tayi kondjele emanguluko lyaNamibia SWAPO, inayi ithane-nwa mo natango ihe konima yoonkundathana iilyo yewiliko lyongundu mewiliko lyomusamane Sam Nujoma, oya li ya thiki wo muCairo, opo yi pewe uuyelege kuAngola naCuba nkene oonkundathana dhe ende.

Kakele kokwaatsa kumwe kwa holokele po moonkundathana ndhoka, oongundu adhihe dha li moonkundathana; Angola, Cuba, SA naAmerika omupokati gwawo, ayehe oya halakanene ya tsa kumwe esiku 29 gaSeptemba li kale etameko lyomalongekidho gokutula miilonga oshitokolitho 435 shiigwanahangano, pauyelele womumbisofi mboka a zi nawo molweendo.

Omumbisofi okwa gandja omukumo koshigwana shaNamibia shi tsikile negalikano ngaashi shito. Okwa holola wo uupyakadhi waNamibia ye u kundathana noonkondo moshigongi shawo shewilikongundu lyehangano lyAakwaluther.

Okwa ulike wo ketumwalaka ndyoka ye li tumine omapangelo goongundu adhihe dhi li moonkundathana opo ga tsikile nekundathano ndyoka nelalakano lyokuhulitha po iita moshitopolwa.

Emanguluko lyaNamibia olya kundathanwa koongundu ndhika okuza Mai nuumvo petameko. Etsikilo lyadho kuWashington



Omumbisofi K. Dumeni

11 - 12.7.1988, oshiwike shika, etine, moka mwa li ando taku kongwa etsokumwe uuna o-matanga ga SA taga thigi po Angola naNamibia nomatanga gaCuba taga thigi po Angola oshita.

Pashifonkundana shaEtiopia, Hareld omusamane Jorge Risquet Valdes, oshilyo shokabinete mepangelo lyaCuba okwa ti kutya epangelo lye olyi ilongekidha okwiithana ko aakwiita yalyo muAngola, methimbo lyu uvathanwa, tali gandja egameno lyoshilongo shaAngola, lyo itali tulitha emanguluko lyaNamibia moshiponga.

Sebulon Ekandjo

LOANS LOANS LOANS

We grant loans from R1000,00 up to R10 000,00. For further information contact:

Mr. Amadhila Set
P.O. BOX 302
Tel 272
ONDANGWA
9000

For prompt Services send R95,00.

Etokolo lElelongeleki muAmerika

Elelongeleki lOngeleki onghwaevaengeli paLuther muAmerika (ELCA) ola tokola li longe oshilonga muAmerika alishe okweeta po uyuyi muNamibia. Elelongeleki ola tokola li longe pe ha na edimbuko opo momaongalo ayo pa ha kale nande limwe tali pungulifa oimaliwa momahangano oo taa longele kumwe na SA omolwokatongotongo kaye.

Omutumba wElelongeleki oyo ya fikama meengeleki nhatu, eshi da hengumukila mumwe neudo mu-Januali, owa li ko muApilili. Ongeleki paife oi na oilyo i dule eemiliyona nhano. Omuwilikingeleki wayo omubishofi Herbert Chilstrom, okwa teelelwa a talele po Ongeleki ya ELCIN pexulilo lomudo ou.

Ongeleki oyo ya longa shihapu mepangelo layo nomoshiwana oku udifa ko omukundu waNamibia nomanga inadi hengumukila mumwe noshho tai twikile fiyo onena.

OHOFA MOLWOVETA YUU- SIKU ISHEWE MIIPUNDI

Onkundana kutya changano lyaanaveta mOv-nduka, (Lorenz & Bone) otali ka tulitha ishewe mohofa oveta yuusiku tayi longo mOwambo, oya ligolelwa kaantu 400 mOngwediva. Etseyitho olya ningwa komunaveta David Smuts, pethimbo lyeeegululo lyoombelelewa dhuuthemba womuntu 9.7.1988 mOwambo.

Pauyelele wa gandjwa, ohofa moshinima shoka otayi ka ya miipundi 7.9.1988 melongekidho lyomunaveta Hosea Angula nopaindilo lyaawilikingeleki moshilongo. Oshipotha osha li sha pulakenwa lwotango 29.10.1986 mOvnduka sigo 16.1.1988 ohofa sho ye shi ekelehi. Uule womimvo 10 oveta yuusiku sho ya tulwa miilonga, oya kanitha oomwenyo odhindji.

"FILIOQUE" MEHEMPULULO LYOKUNI-KEA-KONSTANTINOPOLI

Ku Tomas Shivute

Otatu tegelele elandulathano epe lyelangelokalunga, tashi vulika kutya kapu na we omathimbo omale opo u ilandele okambo hoka. Opwa kala ngaa iinima yimwe ya kitakana mokuninga omaopaleko, onkee sha kwata ethimbo ele elandulathano ndika li holoke.

Olwo lwotango mokambo hoka mu na Ehempululo lyokuNikea-Konstantinopoli (edhina olya zi mpoka shoka oshigongingeleki shotango sha gongala muNikea (325) nosha ka tsikila muKonstantinopoli (381) nomEhempululo ndyoka omu na 'okantoko' hoka taka popi Ombepo Ondjapuki 'ta zi muHe nomOmwana.'

Pauteologi okantoko haka ka tseyika pashitya shOshilatina 'filioque' (mu nomo). Ongongahangano yaAakwaLuther muuyuni oya pula onkwashiyongeleki adhihe dhi kundathane onkalo yoshinima shika mEhempululo.

Uupyakadhi owa zi mpoka sho Ongeleki yokuzilo (naandhoka dha za muyo) inaadhi zimina o'filioque'. MuELCIN okangundu kuuteologi oka pewa oshimpwiyu kElelongeleki opo ka kundathane o'filioque',opo ku monike eyamukulo ndyoka tali tumwa kOngongahangano.

Epulo oli li mpoka kutya ngele otashi vulika okweetha po okantoko hoka 'nomOmwana' opo ehempululo li vule okulongithwa momalongelo.

kalunga guukumwe pokati kAakwaluther nAa-ortodoksi (aauzilo).

Ongeleki yaOrtodoksi oya simaneka ashike Ehempululo lyokuNikea-Konstantinopoli, ngoka gaali: Ehempululo lyopayapostoli nolyakwaAthanasius, itaga longithwa unene. Opo nangoye u landule oshinima shika natu tale ano pamwe 'filioque'.

Elongo ndika lya 'filioque' oli na ekota lyalyo muAugustinus (354 - 430) ngoka a li a kondjitha edhiladhilo, kutya Kalunga He ita yelekwa nOmwana nosho wo nOmbepo Ondjapuki. Omadhiladhilo gaAugustinus oga holoka nawa mEhempululo lyaAthanasius noshinima osha yi sigo oompoka 'okantoko' haka 'nomOmwana' ka gwedhwe mEhempululo ndyoka.

Okantoko hoka itaka holoka momutungilo gwEhempululo lyokuNikea-Konstantinopoli ngoka gwa li gwa ziminwa moshigongingeleki shopakumene (yaayehe) omumvo 381. Oshinima shoka kasha li omukundu opo shi ye moonkundathana nosho wo iithiminiki kaya li ya konekwa.

Pandjokonona o'filioque' oya gwedhwa lwotango mEhempululo lyokuNikea-Konstantinopoli moshigongi sha ningwa muToledo, Spania, 8, Mai 589. Mu Toledo 447 edhiladhilo lya 'filioque' olya li lya kundathanwa pethimbo lyoshigongi. Okwa tiwa:

'He ina valwa, Omwana okwa valwa. Omupopili ina valwa, iha okwa zi muHe nomOmwana'.

Pethimbo ndyoka okwa li taku kondjithwa elongo lyaArius nandyoka lya lukwa 'monofusite', ashike okantoko ka 'filioque' kaka li ka gwedhwa mEhempululo. O'filioque' oya li ye eta ondungu lwotango mokagongi ka li muSeleukia 410.

Pomathimbo gaamboka ya tumbulwa elongo ndika kalya li natango naanaa oshinima shoontamanana sigo opethimbo lyaPhontius (864) ngoka a longo kutya o'filioque' otayi pingathana nelongo lyoohe yongeleki, nokwa limbililwa nokuli ootekiste ndhoka tadhi popile elongo ndika (ooteksti otadhi ka tumbulwa komeho)

Oshigongi shaToledo 589 osha li sha gongala sho omukwaniilwa Reccared a ningi omukriste nokwa etelele aaGoth yomuSpania meitaalo lya yela. Moshigongi shoka omukwaniilwa okwa indile opo elongopukithi lyaArius li pangulwe. MuToledo 589 omwa tholomwa iitsa 23 na o'foloque oya gwedhwa mo mEhempululo. Yimwe yomiitsa oyo mbika:

1.Ngele oku na ngoka ta landula elongo nenge e na ekwathathano naalanduli yaArius na pangulwe.

2.Ngele opu na ngoka ina itaala kutya Ombepo Ondjapuki ota zi muHe nomOmwana... na pangulwe.

3.Ngele oku na ngoka ta ti Omwana nOmbepo kayi thike pamwe naHe, na pangulwe.

4.Ngele oku na ngoka itaa ti: "Gloria et honor-Parti, et Filio, et Spritui Sancto" na pangulwe.

Taku tsikilwa

ETOMPAKANO LYONOMELI YEIMBILO



Amushanga gwOmu kwetu, cimbi lo 165 mEhangano, koshikongitho (oshuuliki) oya ningwa 164, osho omunasikola Samuel Mushi elenga (12) methano ndika a dhimbulukitha omuniifo.

ETUMWALAKA KOMAPANGELO MUUYUNI NOKOONGELEKI

Oraata yOongeleki muNamibia (CCN) oya holola omasiku ngaka uumbanda wayo omolwomapumathano omanene tashi vulika ga holoke natango pokati kaakwiita ya SA noyaAngola, pongamba yaNamibia. Omukalo ngoka Oraata ya ti, kutya otashi vulika gu ka kanithithe oomwenyo dhaakwashigwana oyendji shi vule shito.

Uumbanda mboka Oraata yOongeleki oya ti, kutya owa penduthwa unene kesindano ndyoka lya monika komatanga gaAngola gomombepo nokomaiyengo giikondjitho iidhigu yomatanga ga SA mbyoka tayi monika yu ukithwa kongamba yaNamibia naAngola.

Omapumathano gopooha dhongamba yaNamibia, Oraata inayi tala tashi vulu ashike okukanithitha oomwenyo odhindji, ihe ope na wo ompito akwashigwana oyendji ya ka thige po omahala gawo notaa yi monkalo yuufadhukipo, moka taa kala ya taalela ondjala, ompumbwe yomiti nuupyakadhi auhe.

Omapangelo ge li moonkundathana ando ga dhimbuluthwe eindilo lyaakriste muNamibia, kutya shono sha pumbiwa tangotango osho uyuyuki u etwe po. Omahangano haga longelekumwe nOraata yOongeleki muNamibia, ando ga longekidhe manga kuye

oompumbwe ngashi: omiti, iikulya, omagumbo nomukalo gwomatsakaneno, ompumbwe ndjoka tashi vulika yi ka holoke mbala, shimpa tuu uupyakadhi wiita wa tamekulula moshitopolwa.

Oraata oya ningi ando eindilo koomwayinangeleki muuyuni nokomapangelo omanene naangoka ge li moonkundathana ndhika opo:

a) Ku yambidhidhwe oonkundathana ndhoka dhi li pokati ka SA, Angola, Cuba na Amerika.

b) Ku ningwe oonkundathana nOraata ndjika opo ku kongwe eyamukulo lyoshizemo kehe tashi vulu okuza moonkundathana; ongele ombili, oonkundathana ngele dha piti nawa nenge iita iidhigu muNamibia tayi tsikile ngele nani odha ponyo.

Etumwalaka ndika olya tuminwa oshiwike sha zi ko komapangelo; lya SA, Amerika, Angola, Cuba, Britania, Canada, Fulanisa, Ndowishilanda lyuuninginino, Norwee, Sweden, Denmark, Soomi naHollanda.

Sebulon Ekandjo

ONDJILA YESO NOYOMWENYO

Indeni mo, mu pitile mosheelo shoka sha patekidha, oshoka osheelo shoka oshinene nondjila ndjoka ya mbwalangandja, otayi fala mekano noku na oyendji mboka taye yi lamba, ihe osheelo shoka oshishona nondjila ndjoka ya thinana otayi fala komwenyo, naashona yowala mboka taa yi mo.

Ngele omuntu to ende mondjila wu uka kokuma waa shi ko, ngele owa mona omuntu te ku pukulula ta ti: Ngame oko nda zi; landula ompadhi yandje omo yi li mondjila, ndishi oto dhiginine shili epukululo lye, nethimbo alihe oto tala ngele ompadhi yomupukululi gwoye omo tuu yi li mondjila?

Ohapu yaTate Kalunga twe yi pewa mpaka oyo omupukululi gwetu noyo omulongi gwetu omwaanawa nomwiinekelwa. Indeni mo mu pitile

Aantu oyendji oya tseyo oohapu ndhika momutse. Oye shi shi kutya: Osheelo sha patekidha nondjila ya thinana oyo yu uka kehupitho nosheelo oshinene nondjila ya mbwalangandja oyo uka mekano nomo mu uka oyendji. Omatumbulo gahugunina moovelise ndhika adhihe mbali, otaga pendulile omuntu omaipulo omanene. Omalwashike shi na okukala ngeyi?

Eyamukulo kepulo ndika oyo ndika tali ya: Oshinima kashi li mokutseya kowala aawe, ihe oshinima oshi li molweendo. Ondjila ndjika ndi li muyo nenge u li muyo oyo uka peni?

Esiku limwe omuntu gumwe okwa pula yakwawo a ti: "Uunake omuntu ta piti mosheelo nomondjila ya thinana? Uunake omuntu ta piti mosheelo nomondjila ya mbwalangandja? Oondjila ndhika otadhi adhika peni?"

Opwa li pwa holoka omayamukulo gi ili nogi ili. Nonena ando otu pule ishewe epulo ngaan diyaka. Otashi vulika tatu mono omayamukulo ga yooloka. Eyamukulo limwe lyomwaangeyaka nda popi olya li ngeyi. "Moondjila ndhoka otatu ke enda mo ngele twa si." Osho gumwe a yamukula. Otashi vulika nonena pu kale ngaa pu na aantu mboka haa dhiladhila ngeyi.

Ihe konima yeso oku na we tuu olweendo talu pumbwa epukululo lyasha? Aawe, kaku na. Shila omuntu ota makele nokuli uukwatya wehala moka e na okuya mo, ngele owomeso lyaaluhe nenge owomomwenyo gwaaluhe. Tu taleni nando iiholelwa yimwe: Omuyamba moshaasi Luk.16:23 - 24 na 25; Stefanus omuhokolola mbinzi li.7:56,60; 2Tim.4:6 - 8.

Aamwatate, oshinima osha yela, kutya oondjila ndhika mbali itatu ke dhi enda konima yombila aawe, ihe otu li mudho nena nokuli. Ngame ondi li muyimwe yadho nena, nou li muyimwe yadho nena. Omuntu kehe omukulu-ntu nenge okanona oku li molweendo, muyimwe yadho.

Omuwa Jesus Omukulili gwetu oye omupukululi gwetu. Ta ti: Indeni mo mu pitile mosheelo.... Onawa tu pule manga ngeyi. Oshike sha thininika ondjila nosheelo shegulu? Oshike sha mbwalangandjitha ondjila nosheelo shekano?

Omayamukulo komapulo ngaka agehe Ombibeli oyi ga gandja ga yela. Mondjila yomwe-

nyo omu na oothina odhindji. Omu na omaudhigu gi ili nogi ili ngaashi: Okutondelwa ukriste, okushekwa, okudhinwa nokushudulwa. Omuwa ta ti: Ngoka a hala okulandula adje ni idhimbike ye mwene.....

"Holeni aatondi yeni galikaneneni aahepeki yeni opo mu ninge aana yaho yeni. Mat.5:44 - 45. Kashi shi oshinima oshipu okuhola omutondi gwoye nokashi shi oshipu oku mu pakela po sho a sa ondjala nenge u mu pe a nwe Rom. 12:20. Mpaka ondjila yomwenyo oya thinana.

Mondjila onkwawo ya mbwalangandja, okutonda osho oshipu. Oku mu tindila ikulya nenge omeya osho sha yelega oyendji. Omuwambo omukulu ta ti: Mukweni ngele okwe ku manga noombale ngoye kutha oonkandja. Okuninga ngaaka okwo okupu nondjila oye eguluka.

Ihe Omuwa ote tu longo tu galikanene aahepeki yetu, tu ya galikanene uwanawa. Ya dhiminwe po noya hupithwe. Shika osho ehalo lyOmukulili gwetu. Yangapi yomaantu taa taamba epukululo ndika? Omuwa Jesus omo e ende sho a tile: Tate ya dhimina po oondjo dhawo, oshoka inaa tseyo shoka taa ningi Luk 23:34

Osho Stefanus a galikana Iil 7:60. Ondjila nando ondhigu; Omuwa ta ti: "Kondjeni mu ye mo.... (Luk 13:24) Oshiholelwa shimwe osho shika: Okupopya oshili. Etheni iifundja popyeni oshili Ef 4:25. Moshinima wo shika ondjila yomwenyo oya thinana.

Unene methimbo ndika tu li mulyo. Oyendji oya kanitha oomwenyo dhawo. Ihe mondjila yekano oshinima oshipu. Aniwa ngele ito fundju ito hupu. Ihe oohapu dhaKalunga ketu ihadhi lunduluka, aluhe odhi li ngaashi dhi li. Iifundja otayi pangulwa. Oyo oshilongitho

Kuna kara vakweni kapi aku ninki koure

Posiruwo sokukatuka
Pomazuvha gokuwiza
Momavango gokulinapauka
Moyitata tuna gendi

Monzira zonde twa litoona
Mositata zaShomeya imo twa genda
Mositata saKalufantena, ava tumbura Sivanda
Nedumba lyaRundu, momazuru to lifumbwene

Twa pa upumezuvha yipara
Nani komuzogo iko ngatu ka himburukira
Koutokero yiko ngatu ka tura
Koukwangali, yiko ngatu ka pukura

Tatu lilike nomukuro
Tatu tara kepaimo lyago
Kapisi mesinya mwina
Mesinya omu tuna kara
Sirongo sosiwa-ee!!

Konontere domukuro
Kerwa urundu, korwautokero
Koupumezhuva nokupura si
MoKavango muwaa—waa
Nomuhoko oonzi da tunga mo

Tani wiza ni ku simwitire
Tanko ni uyunge yuma

Mat.7.13-14



shaSatana noye he yayo. Joh 8:44.

"Ne inamu faathana nuuyuni mbuka Rom 12:2. Dhimbulukwa Omuwa Jesus koshipala shaPilatus Joh.18:37a

Iiholelwa yimwe:

A

B

Okudheminathanapo --- Okwaadhima po oondjo
Okupaathana --- ombili --- nokwaa-
paathana ---
Okuvulika kuKalunga --- nokwaaavulika
nokoohapu dhe
Okuhempulula oondjo nokwaa hempulula---
Okwiifupipika --- nokwiinenepeka

Mbika ayihe mu A oya thininika ondjila, manga mu B oya mbwalangandjitha ondjila.

Omuwa Jesus oye ondjila noye osheelo. Joh 14:6; 10:7,9 Ombinzi yaJesus oyo ondjila ompe yi nomwenyo Heb 10:20. Otwa gwana okwiipula natango: Ondi li tuu ondjila ndjoka ya thinana?

Ngele opu na ngoka wa dhimbulula kutya ino thika mo mondjila ndjoka Jesus nenge owa puguma mo mondjila ndjoka yomwenyo, endelela mbala, oshoka oye ita tidha po nando oye. Ethimbo lyoopala ongashingeyi.

Tu yeni mo ano tatu pitile mosheelo shoka sha patekidha osho Omuwa Jesus Kristus Omukulili gwetu.

Sakeus Shaduka

Vamwe ni va tangauke
Tanko ni va tumbagure
Nampo, kapi mwa va diva

Vakwangali vaNampoko
Vambindi vaKakorama
ValyaMuntenda vazona
ValyaNguranene va yipika

Komakuzu gaMuntenda
Komanyandi gaNguranene
Kuvatereka va ha pi
Kuvadosa va ha myoka

Wokasumbere komutwe
Wokantjangu kosinena
Kuzumbura kwawo mbiga
Kugava kwawo muyengo

Vakwetwee! name mukwangali mukweni
Kulimona, tuna limoneni
Kulidiva, tuna lidiva
Tu diworokeni ntanto zaJesus
"Nyame Musita gOmuwa"
Tu lisimbireni momeho
Karen po (nawa,) mbaa

Barnabas Haileka

REAGAN NA THIGE NAMIBIA LYA MANGULUKA: NUJOMA

Tatekulu Efraim Amadhila mOgongo 8.5.88 okwa thigi ko omwana gumwe naatekulu yahetatu.

Ihete Ihete
Ogongo

Megongalo Omulondo kuku Kristina Inane Indongo 28.4.1988 muukokele wowene. Okwa thigi ko aamwayina yaali, Eimbilo 543.

Mbango Tatekulu Kambwa
naAbraham mOmuloondo

Tatekulu Eneas Kashikuka (68) 13.5.1988. Okwa fiya ko ovana vaheyali nomkufiyekadi, ovatekulu 39. John 11:25 - 26

Lukas K. Handunge
Ongwediva Training College

Frieda Mutaleni Iyaloo Namilonga, Omandongo, 1.10.1987. Okwa thigi ko yina naamwayina yaali.

Nkugoyepongo Namilonga
Onayena

Matias Tomas Ihuhwa (39) momukunda Ondembo, mOshigambo 21.5.1988 moshipangelo Tygerberg, SA. Okwa thigi ko aakuluntu ye, omuselekadhi noyana yaali.

Lotty Th. Namba
Oneputa

Omahekeleko

Kaakwanezimo ya tate Viktor Shivute ngoka a manene oondjenda 20.1.88. Kalunga na kale pamwe nane.

SH.G.Shikongo
Ombwelefuma-Uukwambi

Eso
Lusia Ndahambelega Nahum (27) womomukunda Ohaali - Olupandu 16.5.1988 ombaadililila moshiponga shoshihauto. Okwa thigi ko yina naamwayina 6.

Eimbilo 84, Omuudifi 3:1 - 8

B.Ngonyofi Shivuda
Eengandyo Sec School

Omusamane Fillemon Shivute Kii-mba (67) gwomomukunda Onankali mOndonga, muuwehame wethimbo ele, okwa thigi ko omuselekadhi, noyana 11, aatekulu 18 naatakulululwa yaheyali.

"Omwenyo gwandje oKristus, nokusa okwo elikolo."

Maria Namwandi Shivute
Onankali

Saima Namupa Amukoshi (21) omwilongi mOseko yaNehale 4.6.88. Omuya ota ti: "Oongoka i itaala ndje oye ta kala e na omwenyo nande na kale a sa."

Ndeyapo naPetrus Amukoshi
Omuloondo

Meme Soini Andreas, momukunda Onambeke, Onyaanya mOndonga, 30.5.1988 muuwehame wethimbo ele. Okwa thigi ko he na yina naamwayina nokanona ke kamwe.

Eimbilo 644

Saima Panduleni Shikomba
Onankali South

Ompresidende gwaSWAPO, omusamane Sem Nujoma, okwa popi omasiku ngaka, kutya ehanganano lye olya tegamena neitulomo ompresidende gwaAmerika, Ronald Reagan sho ta ka za koshipundi muJanuali 20, 1989, andola a thige wo Namibia lya manguluka nale. Omusamane Nujoma shoka okwe shi popile muLuanda, nosha toolwa po koonzonkundana yi na sha negandjo lyopauyelele kombinga yaNamibia yedhina, Namibian Press Agency (Nampa).

Ompresidende Nujoma okwa hokwa unene ondungedhiladhilo yepangelo lyaAngola yokuninga oonkundathana dhopaupoloma naAmerika, Cuba, naSA. Edhiladhilo ndyoka olya yambidhidhwa wo komapangelo giilongo yaAfrika, pethimbo lyomutumba gwawo muAddis Ababa, omwedhi nguka.

Otatu ligamene shono tashi zi moonkundathana ndhoka, ando pu ningwe tuu ompresidende Reagan sho ta zi mombelewa, lya Namibia huka ando olya manguluka nale, osho omusamane Nujona a gandja omadhiladhilo ge koshifokundane shoka Nampa.

Oonkundathana dhemanguluko lyaNamibia pamwe neshunitho lyAACuba ya ze muAngola odha tamekele omasiku 2 sigo 4 gaMai muumvo muLondon, Ya li moonkundathana ndhoka; Angola, Cuba, Rusia, Amerika naSA

Oonkundathana odha ka tsikila ishewe omwedhi ngoka kuCongo, Brazzaville. Etsakaneno lyomupresidende Reagan gwaAmerika nomupresidende gwaRusland Mikhail Gorbachev muMoscow, oshilandopangelo shaRusland nuumvo muJuni, natango olya kundathana emanguluko lyaNamibia.

Momutumba moka omo mwa zi ethaneko ndyoka lya ziminwa kuyo yaali, kutya 29 ga Septemba nuumvo li kale etameko lyetulo miilonga okatokolitho 435, kiigwanahangano.

Omutumba omutitatu gwoonkundathana ndjoka ogwa li 24-26.6. 1988 mu Egipiti, pokati kAmerika, Cuba, Angola na SA. Moonkundathana otapu kongwa etsokumwe, kutya uunake nongiini omatanga ga SA taga zi muAngola nomuNamibia shi ningilwe oshita uuna AACuba taa zi wo muAngola.

Natango epangelo lya SA olya nyenyeta etungalo lyaakwiita yaAngola popepi nongamba ya Namibia ndyoka ta ti, kutya oli li mumwe naAACuba osho wo aakwiita yaSWAPO. Omukalelipo gwepangelo lyaAngola muLusaka, omusamane Luis Neto Kiambata, kepopyo ndyoka, okwa ti ashike, kutya omatanga gaAngola pamwe naAACuba, oge na uutheмба paveta yuuyuni okulala okahala kehe ke li meni lyevi lyaAngola. Omusamane Kiambata ota ti SA ota hepekwa owala komahaluhalu ngoka ge mu na omoluumbanda.

Omasiku ngaka opwa kundana ehanganano lyokondjitha okatongotongo muEuropa nokutya epangelo lya SA olya mbesitela iilongitho

yomiita yopamalusheno kuBritania nokuNdo-wishilanda lyuuninginino.

Omumvo 1977 Oraata yegameno ya UNO, oya ningile ontokolwa pwa minike nando epangelo nenge ehanganano lyontumba ndyoka tali pindike iilwitho na SA. Ayehe, Britania naNdo-wishilanda oye li iilyo yaaluhe moraata yegameno ya UN. Ayehe oye shi ikala.

Moshiningwanima shi ili, ompresidende Nujoma okwa indila ekwatho kehanganano lyaaniilonga lyuuyuni auhe (International Labor Organisation / ILO, opo li yambidhidhe Ehanganano lyaaniilonga muNamibia, opo ndika li vule okutsikila nekondjo lyalyo. Ehanganano lyaaniilonga muNamibia, okupopila uutheмба womuniilonga kehe, mboka wa lyate-lwa pevi, osho Nujoma a ti.

Omuwiliki gwaSWAPO Nujoma okwa li ta popitha omutumba gwehanganano lyuuyuni omuti 75. Okwa pandula noonkondo iilongo yimwe mbyoka ya tameke nale okuningila SA ondjindikila yiipindi noti indile natango mbyoka inayyi tameka, yi shi ninge mbala.

Kombinga yaakondjelimanguluko mu SA, o m u - presidende Nujoma okwa ti, ehanganano lye otali yambidhidha aantu mboka nota kumagidha ashike aatiligane muNamibia, kutya ekondjo lyaSWAPO kali shi okukondjitha olwala olutokele, ihe okuhulitha po uukoloni moshilongo nokatongotongo kawo.

Aatiligane ye vule 30, oya zile muNamibia ya ka kundathane naawiliki yaSWAPO pondje yoshilongo. Olweendo nduka pehulilo lyomwedhi nguka, olwa landula omalweendo omakwawo ngoka ga ningwa kaatiligane omimvo dha piti. Olwindji mboka ya yi ko, ohaa galuka nomadhiladhilo omape.

Sebulon Ekandjo



Ompresidende gwaSWAPO, Sam Nujoma

“OTO KE SHI VULA, IHE HAKOONKONDO, DHOYE, AAWWE, OKOMBEPO YANDJE”

Hakomapangelo nohakoonkondo Sak.4:6, osho sha li oshipalanyolo nehuku mepopitho lyomumbisofi Kleopas Dumeni, kaasita omugoyi ya yapulilwa oshilonga shawo mongeleka yopaumbisofi mOniipa. Oshithuthi osha ningwa pamwe nelongelokalunga lyaayehe 12.6.1988. Omumbisofi okwa fatulula oshikalimo sheyapulo ngeyi:

Olyo okuyoololelwa oshilonga sheuvitho lyevaangeli.

- Okupewa oonkondo okutopola omasakramendi
- Okupewa montaneho yaayehe oshimpwiyu shoshilonga shokuwilika egongalo noshehngomwenyo okukwatha omuntu aguhe.
- Okupewa iipatululo okwiigidhila ooyakwawo emangululu moondjo.

Moluunene woshilonga, omumbisofi okwa fatulula a ti, omusita oku na okukala e na uukwatya ngaashi tau landula mpaka:

- E hole Kalunga
- E hole oshilonga shusita
- E hole Ongeleki noshilongayakulo shayo
- E hole aakwanegongalo monkalo yawo kehe —ye li mo.

Okuyapulilwa uusita, itashi ti, omusita omuyuuki e vule yalwe, ihe naye ota hupithwa kesilohenda ngaashi aantu ayehe medhiminwopo lyoondjo.



Aasita mboka ya yapulilwa 12.6.1988 mongeleka yaNiipa

Eyapulo lyomusita

Eyapulo ndika otali yoololele omuntu moshilonga sheuvitho lyOohapu dhaKalunga netopolo lyomasakramendi omayapuki. Shika osho omulandu nelongo lyOngeleki wo yetu. Tashi ti nakuyapulwa ngashingeyi okwa zimina okulonga montaneho nokupopila eyakulo ndika eyapuki nokuhepekela eithano ndika, ngele ethimbo otali shi pula. Omolwaasho olwaala lweyapulo lyoludhi nduka, olwo **olutiligane**, tashi ti omuyapulwa okwa yoololelwa **uuhokololambinzi**.

Alba

Pethimbo lyetu aasita naalehtoli (aateolohi aakiintu) ohaa longitha omuzalo omutokele ngoka tagu ithanwa Alba (vestis alba = tashi ti omuzalo omutokele). Alba oyo omuzalo omukulu gwa li gwa longithwa kaashashwa, manga inaagu ya meyakulitho lyaasita. Omuzalo otagu hokolola uuyuuki mboka tau zalekwa omuntu peshasho.

Alba otayi tu kumagidha tu dhimbulukwe aluhe okushashwa kwetu yene, nuuwanawa mbuka tau zi meshasho, naashoka tali tu pula. Omuzalo nguka otagu tu dhimbulukitha wo kutya oohapu dhaKalunga otadhi ti: "...Ihuleni ano iilonga yomilema ..., homateni omahwata guuyelele..., endeni pamikalo ongashika omutenya..., zaleni Omuwa Jesus Kristus..." (Rom.13,12,13,14).

Cingulum

Alba oyi na aluhe okumangithwa omuya (ongodhi ontokele). Omuya nguka otagu hokolola egameno, okutinda okulongithwa iilonga yomilema, ihe omuntu a dhiginine shili. Osho wo omuya otagu kumagidha aakwane-

Tala kep. 6

Ojutkangas ishewe muNamibia



Dr. Ojutkangas pokati nokolumoho M.Amadhila na F.Ashipala kolulyo

Ondohotola Reijo Ojutkangas, oku li ngashingeyi mOwambo ta ningi ookersesa dhaamboka ya hala okukwatha yakwawo moshiponga sheyonuko lyelongitho nayi lyomalovu. Ookersesa odha tamekele moshiwike sha yi mEngela notadhi kala iiwike iyali.

Oprojeke yekwatho lyaavu yomalovu, dr, Ojutkangas okwe yi tamekele omumvogu mu-Kotoba, pamwe nomuhungimwenyo omusita Festus Ashipala. Mokushuna kwe kuSoomi, elongithonayi lyomalovu olya holoka konyala miifo ayihe yomuSoomi nosha li sha limbilike Aanamibia mboka taa ilongo hwiya.

Euvoko omolwashike aatiligane ya hwama okulanditha omalovu mokati kAaluudhe oli li

Omusita omoluupyakadhi woshilonga shoka te shi longo nomolwehupitho lye mwene, oye ota kondjo a kale omuyapuki, omunashili nomudhiginini moshilonga she, osho omumbisofi a fatulula shoka tashi pulwa omusita pethimbo lyeyapulo. Oto ke shi vula, ihe hakoondkondo dhuukwiita nenge komatha goye mwene, aawe, okOmbepo yandje, osho e ya kumagidha olwindjilwindji mepopitho lye.

po tali yelele Aanamibia oyendji pethimbo ndika, nokutya oshi na elalakano lyokuteya po omwago gwoshigwana paupolotika nopankalathano, opo aakolonyeki ya mone uupu wokupangela nokufala komalalakano gawo guupika.

Ongeleki ndjoka ya kala okuza petamekolela yi li omukondjithi gwomalovu, oya tsikile oshilonga shika noprojeke tayi totwa, okukwatha nokuhupitha oshigwana meyonuko lyopalutu. Omusamane Ojutkangas ngoka omuwiliki gwehangano lyokukwatha oonkolwe muSoomi, ohi ithanwa kOngeleki yaELCIN, opo ya kwathathane naAshipala okudhika oprojeke yoludhi ndoka mOngeleki.

Sebulon Ekandjo

nokutya

- ouluvi neenelive
- oilyo yoludalo
- omutima, nomifipa dohonde
- eefiyo
- exuli
- omesho nomadjadja
- omapunga, ohonde, oshipa, omakipa, eenhumba nosho tuu

Ino holeka Amushanga gwoshifo edhina lyoye nondjuki-thi nando wa hala okulongi-tha edhina lyefutamo.

Omupristeli gwtango mOwambo a yapulilwa oshilonga

Dha za kep. 5

gongalo ayehe, aanene naashona." Kaleni omuthika, mwi imangeleka oshili moombwelo..., (Ef.6:14). Kehe ngoka a hala okukondja ekondjo ewanawa lyeitaalo, ota fudhithwa keuvaneko ndika kutya Kalunga ota zaleke oonkondo (Eps.18:33).

Omusita ngele ta dhimbwa omuya nguka moshinyanga, nena onawa aakwanegongalo ye mu dhimbulukithe, kutya oku na omuzalo inagu gwana po.

Ngoka a li popepi na se oshimpwiyu opo omusita a kale 'a fewa'. Omusita ngele a manga alba nongodhi ngashi hatu popi, ota dhimbulukithwa wo oohapu dhOmusita omukuluntu "Oshili, oshili tandi mu lombwele sho wa li omugundjuka, owi izaleke nowa yi nkoka wa hala; ihe nge te koko, nena to yelutha omaako goye, gulwe ote ku zaleke note ku fala nkoka inoo hala ko." (Joh.21.18).

Stole

Ostola oyo elapi ndyoka hali tentekwa komba-

Tala kep.9



Ongeleki yaShikuku nando onene, kaya li tayi gwana aakwashituthi, onkene osha longekidhilwa pondje

Oshikuku, Owambo: Omugundjuka Liborius Ndumbukuti Nashenda, okwa ningi egano lye 25.6.1988 mOshikuku, okutaamba oshilonga shuupristeli (uusita). Oshituthi sheyapulo osha li shotango mOngeleki yaKatoolika moshitopolwa shOwambo. Omumbisofi Boniface Haushiku, oye a ningi eyapulo

Aanashilonga oyendji yOngeleki ndjoka, aasita, aadiakoni, ookarekere noosesta oya li ya zi koombinga adhihe dhOngeleki mOwambo nopondje okutaamba omunashilonga pamwe nayo. Eyapulo lyaNashenda, omvatele yaShikuku, muupristeli olya talika kaakriste yOngeleki yaKatoolika, kutya onkatu onde ya katukwa oku uka meithikameno lyOngeleki ndjoka.

Ongeleki yaELCIN oya li ya thikitha ekundo lyayo moshituthi shoka mokana komukwathi gwomumbisofi, Matti Amadhila. Iilyo oyindji yomangalo gaELCIN moshitayingeleki shuuninginino nayo oya li ye ya moshituthi shoka oku ulika uumwayinathana pokati koongeleki ndhoka mbali.

Sebulon Ekandjo



Omupristeli omupe Liborius Nashenda ta yapulilwa moshilonga komumbisofi B. Haushiku pamwe naayakuli ye

Ovo ve tu shinda: Angola

Epangelo laAngola ola nyamukula komapopyo a SA, kutya Ovacuba ova ponokela Calueque, opo SA e na omashina okupombela omeva kuNamibia. Onhele oi li konyala eekilometa 30 meni laAngola.

Moshiponokela osho, SA ota ti okwa kanifila mo ovakwaita vaye 12 nOvacuba 300. Eshi SA okwe shi nyematela unene, osheshi vati Angola okwe shi ninga pondje yeudafano lavo muBrazzaville, muMai neudo, nokutya Angola ita ka shinda nande oilonga yomeva moCalueque.

Epangelo laAngola, ola nyamukula, kutya SA oye a shonga tete eekamba daAngola moTchipa, moumbuwantu waAngola, omo mwa fila ovakwaita vaAngola vahetatu, ndele

hamafele atatu. Eshi osha ningwa 26.6.1988. Efiku la shikula, omatanga aAngola okwa ponokela moCalueque nomwa kanena ovakwaita va SA 26, pahokololo laAngola.

Olushindo laye keekamba daAngola, SA ihe li popi nande, ndele oha nyematele ashike okuhalineekelwa kwepangelo laAngola, eshi ta ti ohali nyono omaudafano. SA ota nyematele yo omalinyengo Ovacuba popepi nongaba yaNamibia. Angola ota ti, oshi li moufemba waye e linyenge keshe tuu opo a hala meni leengaba doshilongo shaye.

Menyeme laye, SA okwa ti ita xulifa po nande eenghundafana odo di li paife metifa, pokati ke naAngola, Cuba osho yo Amerika omupokati wavo. Pefimbo eli, SA okwa itavela kutya ovakwaita vaye 9000 ove li natango muAngola.



Omuyapulwa Pata Liborius Nashenda

OSHILONGO

SHETU: NAMIBIA

Shekutaamba V.V.Nambala

Oshitopolwa shahugunina

OTU UKA PENI?

Muule womimvo 22 Namibia olya lalwa kuSouth Afrika kondje yoveta yuuyuni. Omi-mvo 10 dha piti po South Africa a pa ko ombunda ketokolo lyIlgwanahangano ndyoka 435. Pehala lyokupitika ehogololo li ningwe moNamibia, South Africa ota tsikile nokudhipaga nokudhipagitha Aanamibia meni nopondje yaNamibia. Ondjuulukwe yemanguluko otayi koko esiku kehe mAanamibia. Nomolwashaoka otaa imbi ngeyi:

1. "Tu kondjeni nomukumo
Nehalo ewanawa
Uuwanawa wetweni
Ngele lya manguluka.

2. Ondjembo tayi topa
Ombinzi tayi tika
Magumbo taga fikwa
Uukoloni nau mbombwe.

3. Ootate katu ya na
Oomeme aaselekadhi
Uunona twa ningi oothigwa
Molwevi Namibia."


(Eimbilo ha ngame nde li tota!)

Esiku kehe oomwenyo otadhi kana nombinzi otayi tika moNamibia. Otu uka peni? Otu uka kemanguluko! Onakuyiwa ya halika kAanamibia oyemanguluko, yombili, yuuyuku noyepangelo lyaantu yoyene. Oku ya pa shilwe shaa shi emanguluko, itashi fudhitha oomweyo dhawo.

Uukoloni wiilumbu owu na okuhula po. Uukoloni weegameno owu na okumona ehulilo. Aanamibia ngele taa imanga kumwe, emanguluko otali ya mbala. Aanamibia naa koneke kutya, uukoloni ou li pamikalo odhindji.

Onkee osha pumbiwa oompito adhihe dha kolonyekwa --- omadhiladhilo ga kolonyekwa --- ga mangululwe. Okudhiladhila nokulonga kwAanamibia nokulalakanena ondjila yemanguluko noyepangelo lyAafrika alihe okuza moonkandja dhaakwiilongo. Aanamibia ilongeni mwa tala okulonga nokuyambula po evi Namibia lya manguluka, ihe hashimaliwa nokulikola. Mboka mu na iimaliwa nena ilongeni okuhupa mwaa na sha, oshoka ethimbo otali ya li mu pule okulonga peha lyokulya nokunwa.

Ekwatathano lya kola olya pumbiwa okutungwa mokati kAanamibia nokAafrika ayehe. Ya koneke omutondi gwaAfrika ngoka olwindji te endele mombepo yuukapitali noyuufukulume. Nenge te ya nokuli te endele mokati kaantu yetu yene mboka twa tala ando oyetu. Aayafrika naa lungame wo okulongithwa ya fa iipopitha mokukolonyeka yakwawo peha lyaakwiilongo mbo-



Aakwiita ya SA mu-Angola naNamibia, oye eta mo ekanitho enene lyoomwenyo

Okomitiye yOraata yOongeleki muNamibia (CCN) oya gandja pehulilo lyomwedhi gwa yi etumwalaka lyayo komagongalo agehe goongelekishilyo ga thikame kumwe noga kondjithe shono ye shi luku "oo, kondo dhomilema" moshigwana. Pamwe netumwalaka ndyoka, okomitiye oya gandja wo efatululo lyayo kiifo, moka etanga lya SA lya ulikwa kutya oyo omukanithi omunene gwoomwenyo odhindji muNamibia nomuAngola.

Mombilive komagongalo, aakriste oya dhimbulukithwa egwanitho lyomimvo omulongo, 17.10.1978, Oraata yOongeleki sho ya dhikwa moshilongo. Okwa dhimbulukithwa wo egwanitho lyomimvo omulongo, 4.5.1978 Aanamibia 600 sho ya sile miikaha ya SA negwanitho lyomimvo omulongo, 29.9.1978, oshitokolitho 435 sho sha ziminwa shi ninge omufango gwokumangululitha Namibia.

Omakwatopo gaantu kaape na epangulo, omadhengo, omayonagulo gomaliko, etilo nuumbanda, omaso gaantu nogiinamwenyo nendopo lyaalongwa moosikola, oyo yimwe yomiinima oyindji ya ulikwa mombilive ndjoka ya kala tayi pangele muule womimvo ndhoka omulongo dha zi ko.

"Oonkondo dhomilema, eso nehanagulo oyi na tuu oonkondo yi vule oonkondo dhuuyeleele, omwenyo netungo? Kalunga okwe tu ethela tuu miikaha ya SA netanga lye edhipagi? Onaku ya tuu esiku, uuna omaupyakadhi agehe ngoka ga pita po?" osho omapulo mombilive kwa tiwa oge na ando okwiipulwa nago nena. Eyamukulo kugo, ombilive oya ti, otali adhikwa muMateus 8:24-26, Jesus moonkondo dhe sho ta vulu oku-

ka taye ya uvanekele omagumbo omawanawa mu -
Europa noku ya undula koombunda ya longwe uduhudhu niuhuna maantu yawo yene.

Shika ngele itashi ningwa, Afrika niilongo yalyo kape na siku nali manguluke dhoshili. Osha yela ethimbo otali ya, uuna Afrika alihe tali kala lya manguluka. Onkee tatu dhimbulukwa Afrika megalikano ngeyi:

PRAYER FOR AFRICA

We thank you and praise you God
We thank you for the continent of Africa
We thank you for the ancestors,
Who have not only given birth
To the children of today,
But who also have shaped
The humane culture and traditions of Africa.
*Lord in your mercy *** Hear our prayer

We thank you for the beauty of Africa
All the shaped the good sense of Africa
We thank you for the rains, natural pans
To contain waters of Africa
We thank God for the wind which gives life
And the wild animals and resources
Which made Africa more attractive.
We thank you for the seas around Africa
Which for centuries protected Africa

lotitha niikungulu yefuta.

Ombilive oya tsikila nokuhiya aantu moshigwana shika, ya pendule po ombepo yuukumwe mokati kawo. Oya londodha kehe gumwe i iyageke okuningwa oshilongitho omolwiimaliwa nenge mokwaanongela omakoto ga SA.

"Otatu hiya kehe gumwe gweni a yande omimoto omiwinayi dha SA naalanduli ye mOongeleki nenge pondje yayo," ombilive ya londodha.

Aanashilonga naaniimpwiyu ayehe mOongeleki nomoshigwana nayo oya kumagidhwa kombilive ndjoka ya longwe iilonga yawo metilo eyapuki koshipala shaKalunga, noyi iyageke okukonga uuwanawa wawo yene molwolwiho lweliko lya nyata, esimano nenge etuwalalo.

Aasita yomagongalo, aapanguli, aanaveta, aalongi yoosikola naataleli, oondohotola miipangelo naapangi, aaleli yiilongo nooyene yomikunda, aanapolotika naayehe ye na iinakugwanithwa mokati kooyakwawo, oyo ya tumbulwa koshito montumwafo ndjoka ya kale ya kotoka methimbo ndika.

"Kalunga omunankondo adhihe ota wilike aaye mboka taa lalakanene uuyuku medhina lye," osho ombilive ya hulithwa noku ulika kotekisti yomuJohannes 15:16. Ontumwafo oya shainwa kuAmushangandjayi gwEhangano ndyoka, omusita Shejavali nokomupresidende gwalyo, omumbisofi James Kauluma.


Sebulon Ekandjo

Otashi ti ngiini?

Nandi kwathwe ndi yelithilwe elombwelo hali kala mOmukwetu li li ngeyi, "Landela hano eshiivifo loye onhele mOmukwetu". Kandi uvite ko kutya tashi ti ngiini?

EYAMUKULO

Ngele ou na shoka wa hala okutseyithila omuntu kehe moshigwana shopaumwene ngaashi okungeshefa nenge okutaamba aalongwa posikola yoye nosho tuu, osho shoka twa dhiladhila.
Amushanga gwOmukwetu




Shekutaamba Nambala


EPANDULO KOOKUME AYEHE

“Talení ohole yaKalunga”.

Oomvula ndhika mbali 1987-1988, otwa li twa pewa iituthi yoluhodhi mezimo lyetu lyaakwaDumeni. Eti 14 Juni 1987 Josef P. Dumeni gwoomvula 41 okwa li a dhipagelwa muAngola kaakwiita yaSuid-Afrika sho a li a landula iimuna ye ya yakwapo. Okwa thigi ko omukulukadhi gwe, aanona yahamano, nonkelo ndjoka ya valwa konima yeso lye. Okwa fumvikwa eti 17.6.1987.



Josef Dumeni



Omuyevangeliste Max Shuuya a zimbulwa

Omuyevangeliste Max Shuuya okwa valemwa mOkalindi Uukwambi 1917. Okwa longele mUushi-mba pethimbo lyuugundjuka we. Okwa yi kenogelo mEngela 1960, pamwe nomuholike gwe nkoka a nongekwa okuteleka iikulya yomaludhi nomaludhi oshoka wo okuhondja, okutunga oombindja omatsilu nosho tuu.

Okwa longo megongalo Ogongo moka a yakula ondjakulwambinga yokOkando, osho tuu kepyatumo kUutsathima hoka a li ha yi nokambasikela ke. Okwa longo oshilonga she nuudhiginini mokati kaakwankala noya li ye mu hokwa unene. Egongalo Olupumbu sho lya totwa, okwa ningi omukwanegolo moka a longo nokwa hulithile methimbo lyoshipundi shevululuko lye.

Okwa adhika kuunkundi wolutu. Okwa mono epango moshipangelo mOvenduka 1986, opo konima okwa lalekwa okuya kegumbo lye. Mo 1987 okwa taambelwa moombete mOshakati. Okwa kala mo owala iiwike yontumba e taye mu tumine ishewe kOvenduka, nkoka a kala ko owala konyala iiwike itali nenge itatu lwaampo, sigo a hulitha eti 29.9.87 maepipi lyoomvula 70 nokwa fumvikwa 3.10.1987 mOkatyaya, Olupumbu.

Otatu pandula Tate Kalunga sho e tu pele tate gwetu ependa sho e tu galikanene ethimbo alihe nokwe tu uvithile elaka etoye. Shoka e tu thigile osho uuyamba unenenene mpoka tatu likola eliko lyaaluhe itaali hulu po nando. Aanona ya nakusa osho ya li ya tumbula ngaaka.

Ally-N. Shuuya
Oshakati

Eti 31.10.1987 omumati gwetu, Leonard Nangolo yaDumeni gwoomvula 24 okwa mana oondjenda dhe moshiponga shekandomo lyoshihauto kOlange. Okwa fumvikwa et 7.11.1987 mOniipa.

Eti 19.2.1988 onkelo yetu omukwanambwiyu Anna Ndahambelega Twahafifwa yaDumeni gwoomvula 19 okwa mono oshiponga metopo lyomboma mombaanga yaShakati e ta mana oondjenda eti 5.3.1988 mOshipangelo shepangelo mOvenduka. Okwa fumvikwa pamwe nooyakwao mboka ya sile moshiponga shoka, eti 12.3.1988 mOngwediva.

Miituthi mbika ayihe ya ningwa muile woomwedhi omugoyi (9) ya landulathana otwa hatwa po koluhodhi noonkondo.

Ohole yeni onene kutse:

Miituthi mbyoka ayihe, Kalunga okwe tu hololele ishewe ohole ye, nolukeno lwe nohenda ye onene kutse. Shika otwe shi dhimbulula sha pitile mune amuhe sho miituthi mbyoka yoluhodhi oludhigu, mwe tu yakula nohole onene.

Omwe tu yakula moompumbwe dhetu adhihe nohole onene. otwa kolekwa meitaalo lyetu enkundi, kune ookume amuhe: MuNamibia, Afrika, Europa, sigo Amerika napalwe. Omwe tu kwatha nawa: okuholoka kutse, okukala pamwe natse megumbo. Okukala pamwe natse



Anna-Ndahambelega Dumeni



Leonard-Nangolo Dumeni

momafumviko mu li oongundu oonene, omatumwalaka, omayakulo gopaunamiti miipangelo, omavitho, omakumagidho nomagalikaneno. Omayakulo gopaikulya otwe ga kuminwa shili. Otwa dhimbulula nepandulo kutya: **Ohole yeni onene kutse, Ezimo lyetu.**

Onke peha lyaakwanezimo aakwaDumeni ayehe mpoka ya ka tsa, otandi thikitha epandulo lyetu kune ookume amuhemuhe, noku mu hololela kutya: Otwa kolekwa kune. Otwa longwa oshindji kune. Otwa dhimbulula ishewe nomeho omape ohole, ohenda nolukeno lwaKalunga olunene kutse, sha pitila meyakulo lyeni. Tangi unene. “Talení ohole ya Kalunga” 1Joh.3.1

Nando tatu hepekwa kondjuulukwe okuyuulukwa aaholike yetu, otwa taamba ehala lyaKalunga ewanawa nolyesilohenda. Onkee aamwatate amuhemuhe: “Kalunga ota vulu oku mu pa oshindji shi vulithe pu shoka mwe shi pumbwa, ne mu kale wo (aayamba yiilonga iwanawa) mu na sha sha gwana okugandjela koshilonga kehe oshivanawa “ 2Kor.9:8. Tangi, Tangi, Tangi unene.

**Pehe lyaakwanezimo
Kleopas Dumeni**

EPUKULULO

Moshifo shOmukwetu shaMai 30, 1988 ep. 12 pomatseyitho gomaso, mono mwa li eso lyakuku Rehabeam Frans momukunda Ondeshela. Shono epuko enene, omuntu ye mwene okwa sa shili, ndele edhina halyo nosho wo omukunda hagwo.

Nakusa oye Rebeka Frans (56), omukunda Ondaashala, Uukwiyuushona mOndonga.

Nikodemus A. Shangula

A KA FUDA PO MANGA

Omweevangeliste Gideon Shakaalela okwa lekela vali engafifi linene lovakwaneangalo vaye mongeleka Swakopmund eti 19.6.1988, eshi a yuka mofudo lokomudo loule womwedi umwe, okutameka lotete laJulii nota ka hovela oilonga vaye Kalunga ngeenge e shi hala muAguste 1.

Efiku olo tuu olo Shakaalela okwa shasha onunona vahamano, ovakufilwa 12, novakolekwa 24. Ouvalalo Uyapuki okwe u tukulila natango ongudu inene efiku olo.

Pefimbo lefudo laye Shakaalela ota ka kala e lipyakidila unene neumbo laye lopaumwene epe opo a yapukile omufita mupe J. Ndevahoma a nangekwa meongalo Onangolo.

Ongeleka moSwakopmund oyo wa lombwelwa nale u tume ekwalo layo, oya pwa nale okufanekwa, nefano otali ka pewa diva omubishofi K. Dumeni. Shakaalela pefimbo lefudo laye 24.7.1988 ota ka popifa ovakwaneangalo meongalo Okambebe, omo a endela ofikola yongula, vo namene Justina Shakaalela opo meme a fikola ofikola yeshasho.

Eongalo Okambebe olo eongalo lovakulunhu vaShakaalela. Okambebe ka ninga eongalo 1.1.1988. Onangolo omo tate Shakaalela a longa cedula 15.

Gideon Shakaalela
Swakopmund

Ova shangela nge tava ti.....

Meme Lavinia owa fa wa hala okutya omusamane Kalangula okwa panda omakakunya moNamibia? Shaashi ou li kOvenduka lesa nando oshifo sho "The Namibian" shaApilili 15, pepandja 6. Mpoka omusamane Kalangula ota popi nomusamane Botha (mwene gwomakakunya) kombinga yomakakunya.

Owa tumbula wo kutya moNamibia omu na ongundu tadhi kondjo "itapu tikile nande oyo ohonde yomunhu," ngaashi wa tumbula CDA, DTA na SWANU. Tashi ti mokati komakunya kamu na omakakunya ge li moongundu dhopolotika? Nenge ihaga tilehi ombinzi? Nenge ga sile koongamba ngaashi tashi popiwa mo "The Namibian" yaMai 12, 1988 pepandja 3?

Tse shoka inaatu hala ongaakriste naaholimbili moNamibia, osho ombinzi tayi tika. Kutya nee oyalye nenge olye te yi tilehi, hasho shi na oshilonga. Onkee tatu ti: "Alikana oonakukondja tuliipo omatati! Go omatati otwa hala ga tulwe po kuSWAPO nokomakakunya --- ihe naga tulwe po oshita, hakombinga. Otwa hala oomwenyo dhaayehe dhi hupe.

Mevi moka ookuku, oomeekulu nootatekulu, ya kala oomvula twaa dhi shi kutya odhi thike naana peni, shoka tu shi shi oshoka kutya, oyo ya

lala evi ndyoka tango manga oonalunanga (oombulu, aatiligane, iilumbu naakolonyeki) inaa ye ya mo momumvo 1884, sho Ndowishi a kutha ko nokwa yugu ko Namibia koonkondo dhuufukulu-me.

Esiku 4 Mai ohali gongaleke ooitaali aakriste naaholimbili muuyuni auhe, opo ya galikanene nokudhimbulukwa Namibia naakalimo yamo ayehe --- aakalimo yonale naatiligane wo mboka opo ye ya mo noya ninga Aanamibia. Shika osha kala tashi ningwa muule womimvo omulongo dha piti po nguashingeyi.

(Ngiika owa li waa uvite ko sho Aanamibia nonuumvo ye shi ningi moOvenduka wo.) Shoka sha li konima yesiku ndyoka, osho omadhipago gaa fele nogopaukoloni ga ningilwa Anamibia muule woomvula 104 dha piti sigo onena.

Sho shika osho nee nda hala ndi ku lombwele sho shi ninge uuthiga wo ye meme Lavinia tii ku pe nonando ku shi ngiika omukwetu (iinima ndishi owa ti omazimo?

Otandi tumbula ko owala yimwe-yimwe. Osho ende ngeyi:

1. Etseloluyaantu poHoornkrans ('Hoornkrans Massacre')

Esiku 12 Apilili 1893 Aanamibia 150 (mwa kwatekwa aakiintu, uunona naakulupe kumwe 78) oya li ya ponokelwa nokudhipagwa kaAandowishi puHoornkrans molukadhi lwaNamibia.

Ye li 100 oya ehamekwa na 80 oya ndholongopalekwa. Medhipago ndika Aandowishi oya li yi ihomateka oondjembo 200 dhoshinanena pethimbo ndiyaka mwa kwatelwa ndhoka haku tiwa o "Model 88," nomakanona. Oya li mewili ko lyaKapitiya Curt von Francois (Franke).

Tala kep. 10

Eyapulo lyomusita

Dha za kep.6

nda yoalba nolya mangwa komuya ngoka twa popi metetekelo. Elapi ndika otali holola 'ondjoko' nomutenge gwaKristus (Mat.11:29-30. Ostola otayi uvitha wo kutya omukriste kehe ni ifupipike ye a wilikwe kuKristus ngoka ondjila, oshili nomwenyo. Omuwa ita gandja omutenge gu vule oonkondo dhetu. Osho wo lipango yOmuwa 'kayi shi iidhigu' (1 Joh.5:3).

Ngele nani ukriste otaw ulike wa fa oshinima oshidhigu, otu na tango okudhiladhila. Otashi vulika twi ihumbateka omitenge noondjoko dhuuyuni, osha yela kutya ndhika odho oondhigu. Tu dhimbulukweni wo kutya: "... oye okwi itsike uuvu wetu omechamo getu e ga humbata... okwa tsuwa omolwomayonagulo getu, okwa nyanyagulilwa oondjo dhetu. Egeelo lye mu ya, opo tu kale tu na ombili, notwa aludhwa kiilalo ye". (Jes.53:4-5).

Tomas Shivute
Paulinum



Moshilongo shetu omu na omukundu. Ombilive yameme Lavinia Nakwalumbu moshifo shOmukwetu gwaMaalitsa 30, 1988 momapandja 10 na 11, otayi holola puuyelele omukundu ngoka.

Omukundu moshilongo shetu ogwoshimaliwa nombepo yokulikola. Eliko nohokwe yuuyamba otayi tu imbi tu pulakenathane tse tu itse oondunge nokuhungila. Onkalo ya tya ngeyi otayi tu etele uumbanda wokutilathana, oshoka ku shi mukweni shoka e ku nine.

Ku popi sha, omuntu ote ku yalulile manga omwaalu gwomafo ngoka e na mondjato ye, ye te ku pula ngoka u na mondjato yoye kutya ogu thike peni. Nenge a pule oonkondo dho ye mpoka dhi thike. Opo ihe konima ta ningi etokolo, ngele nangoye wo ogwomongundu yaayamba, yaalikoli naanankondo opo e ku popithe nenge e ku pukulule.

Hangame nda ti opolotika kayi shiwiike. Ihe omakakunya ogo gene ge shi ti, go taga pula ga longwe. Lesha ombilive yaGerson Titus moshifo shOmukwetu shaSeptemba 15, 1987 pepandja 11. Ngele nani omakakunya otage tu pula omauyelele ge tu dhengithe komazimo, inage tu pula we.

OINIMA YOPAIFE OTAI NYENGANA

Oshiwana oshiholike shaNamibia, konima eshi oshiponga shoboma kOshakati sha longwa, moKatutura meumbo lomushamane Elifas Hamunyela a shiivika nawa (Kambuta), omwa telelwe oboma koshi yohauto yaye oToyota Hilux, pelola lokonima, kombinga yokolulyo. Oshiningwanima eshi osha ningwa 20.2.1988.

Omulumenhu wedina AmERICANO okwe ya peumbo lonomola 028/25 lomushamane Elifas Hamunyela, efimbo lokomatango nokutenheka oboma oyo koshi yoshihauto. Eshi e shi ninga okwa shuna neendelelo linene a ha monike ngeno vati.

Ounona ava va li pehale tava danauka ove mu mona, voo ove mu koneka nawa lela. Ounona shaashi ove li natango mepupi leedula heyali lwaapo, oboma ove i kufapo, ndee tava hovele oku danauka nayo. Olwopotundi onhimulongo yongula.

Konima eshi va mana okudanauka ove i kupula mepandavanda olo li li popepi navolela. Ovakulunhu esni ve i mona, ova dimbulukwa kutya oboma nokonima eshi ovakulunhu va pula kutya olyelye e i tula po, onunona ova ti oya li ya tulwa po kuAMERICANO koshi yohauto, ovo ve i kufa ko.

Opo ve li po efiku olo longula, ove wete AMERICANO te uya ta ende okaendanamhadi te uya okutala ngee oshinima shaye osha ninga ngaho ngaashi a li a hala. Okwe shi litwa shi li mokati kepandavanda vo ovanhu okuye va tala...

Okwa hovela oku i kufapo. Voo ovanhu otave mu pula kutya oshinima osho ote shi twala peni, okwa tya; Eshi Ohasa yange nda li nde i dimbwa po onghela. Koo taku ti, aye osho oboma.

Okwa faduka po ndee ta yuka meendudu nomomilamba. Fimbo AMERICANO ta tewa a yukifwa meendudu, ye Hamuyela okwa ya kopolifi e ke shi popya opo yuuye i mu kwate ngeenge oku na onhapo ya divilika, unene ye a tewe nohauto yopolifi. Opolifi eshi ye ke uya, oya hanga a kwatwa nale kovakwashiwana voo ve mu denga po ngaho.

Opolifi oya hovela kutya nai mu pewe. Ovakwashiwana ove mwaanyena. Shaashi omakakunya okwa li neendjebo, okwa hovela okulukila naAMERICANO a londa ngoo nee. Kakele komukwashiwana umwe oo a denga po ekakunya limwe ndee nembale tali dukako, ovakwashiwana embale tave li xwikepo.

Opolifi ya ya ngoo nee naAMERICANO kodolongo. Oya ka aluka ndee tai i moushiinda shaHamunyela tai kufa mo eendjato heyali dofikola, oshikefa shimwe, nomukonda noimaliwa yokOputu. Moo meumbo omo kamu na sha nande naAMERICANO nande.

Omukulunhu wopolifi Kierie Du Rand okwa ti AMERICANO okwa li oshilyo shaUnita nokwa kala he ke lilopota kopolifi. Kierie Du Rand okwa ti yoo kutya AMERICANO omupolifi. Fiyo onena eli AMERICANO oku li kopolifi.

Andreas H.K. Shiimi Amagola
Windhoek

TALA, TALA,

Omolwashike to teya nohamala okila yoye molwaashoka otayi fuluka nenge ya thita?

Ilonga yokupangela ookila dhiihauto oyi li konima yongeshefa Pick & Pay pokalukanda kaShikoni, pOngwediva.

- Ohatu dhi opaleke
- Ohatu tula mo omandjandja
- Ohatu dhi thitulula
- Ohatu landitha okila kehe

Ila meendelelo tu monathane



Dha za kep. 9

2. Edhipago lyaawiliki lyopaukwiita (Firing Squad Excution):

MuMaalitsa 1896 aawiliki aasimanekewa yaNamibia (kuuzilo), Nikodemus (omutekulu gwaMaharero kaTjumuaha) naKahimemua oya dhipagelwa oshili montaneho (ayehe ya tala ko) pamukalo ngoka hagu ithanwa moshikwiilongo "firing squad" noondjembo, kokangundhipagi kowina komakakunya gAandowishi mewiliko lyaMayola Leutwein.

Uupyakadhi owa li mpoka sho aawiliki mbaka yaali ya li taa pula oongombe dhaantu yawo omayovi ndhoka dha li dha yakwa po kAandowishi muufuthi womokulandathana okuza omumvo 1890. Pomimvo ndhoka Aandowishi oya tutile wo oongombe dhAanamibia 20,000 koNdowishi.

3. Elombwelo-hanagulodhipago lya Von Trotha (Von Trotha's Execution):

Pokati 1904 - 1909 Aanamibia omayovi oya dhipagwa pwaa na omatomelo kAandowishi. Aandowishi muudhudhu wawo nomokwiitala oyo aanankondo, oyi ihomeke nomakanona, noondjembo dhomashina dhoKrupp noMaxin ya dhipage Aanamibia ye li mevi lyawo yaa na ondjo. Oye shi ningi mewiliko lyoshidhukudhuku Ngoloneya Lothar von Trotha.

Aanamibia ye thike lwopo 100,000 oya dhipagwa. Edhipago ndika olya li lya ningwa noondjembo, neendjeleleko noongodhi momiti, ne-nota (sho Aandowishi ya tula omeya uuzigo) nokutidhila aantu komahala genota nondjala nombuga.

Oonakusa mbaka inaa mona efumviko lyomuntu. Oya ethiwa ya napagana nomalundu nokulika kilikama yomokuti nokoondhila. Aakulupe naanona oya tselwa mokutetwa omiligu nokutsuwa nomagonga gokoondjembo ya fa iina mwenyo nomatanga.

Itatu dhimbwa wo oshiningwanima showina sha ningilwe omumvo 1904 aakiintu naanona kumwe 100 kolukadhi lwaNamibia noongombe dhawo dhi thike lwopo 6,800 nomatamba gawo, sho ya li ya kwatwa po kAandowishi nokedhilihilwa (ano ya mangwa). Osho wo oshiningwanima shedhipago shoka sha ningilwa moLower Fish River eti 16 Novemba 1906.

Momadhipago gomimvo ndhika omo mwa sile

aawiliki yaNamibia ngaashi: Hendrik Witbooi (29 Kotoba 1905), Jacob Morenga (20 Septemba 1907), na yalwe. Aawiliki yalwe oya tidhikwa koBotswana hoka ya sile ko, ngaashi Simon Kooper (31 Januari 1913) naSamuel Maharero (14 Maalitsa 1923).

Ooshihupe kedhipago oya kuthwa ashihe ya li ye shi na, yo taa ningwa aapika yiilonga yaakolonyeki yo yamwe taa tutilwa kokantuntu kaShark Island lwopOliindili. Aandowishi oya li wo ya dhladhila ya tutile Aanamibia yamwe oyendji kookoloni dhAandowishi muAfrika ngaashi koKamerun, koTogo nokoTanzania. Nonando inashi ka pita we nawa, oyendji oya sile molweendo taa jalwa ando koKamerun pomimvo 1910-1913.

4. Edhipago kAaputu nOombulu:

Pomimvo 1915 - 1917 Aanamibia kolundume lwaNamibia oya dhipagwa kAakputu. Oonakusa mbaka oya li ye thike po 5,009. Omumvo wo 1917 Aanamibia kolundume ye thike pethete (100) oya dhipagwa kOombulu. Moonakusa mbaka omwa li mwa kwatelwa omuwiliki Mandume Ndemufayo (1917).

5. Edhipago lyoondhila poHaib:

Mai 29 - Juni 9, 1922 oondhila dhiita dhaSouth Africa odha ponokele Aanamibia kuuninginino-lukadhi lwaKalkfontein moondundu dhaHaib nenge Guruches. Oombulu odha li tadhi thiminikile Aanamibia ifendela yoombwa nefikiitho lyoongombe. Oshinima shoongamba dhevi nasho wo omo sha li.

Eponokelo ndika olya li mewiliko lyaawilikimakakunya mbaka: OoKapitiya Jorjaan, du Preez, Prinsloo, Loots naJ.C.Balt. Oya li taa wilike ooSquadron A, B, C, na D, dhomakakunya ge li lwopo 400. Aanamibia konyala 100 oya dhipagelwa ehoolo lyamadhladhilo gawo pambili

Aawiliki Aanamibia ngaashi Abraham Morris, Nikolaas Christian, Willem Kortman, Gert Gertzon naAdam Pienaar oya sile mo. Omanga aawiliki yooJokobus Christian, Tim Beukes naHendrik Sneew ya ningi oonkwatwa molugodhi.

Shika osha li oshikando shotango oondhila dhiita dha li dha longithwa okuwulikitha Aanamibia kepangelo nokompango yuupika, yuukoloni noye thiminiko lyaakwiilongo moNamibia.

6. Edhipago lyomu/Ai-//Gams ("Windhoek Massacre"):

Esiku olya li 10.12. 1959 sho oomeme naaleli ya Namibia 12 ya langekwa kooholo dhaapolisi yoombulu moAi-//Gams. Omolwokuholola omadhiladhilo gawo pambili sho taa thiminikilwa kolukanda lwokatongotongo, oomeme mbaka oya ningi aahokolambinsi nuuthemba wAanamibia monkalo yuupika. Onkee oluanda ndoka olwa mono edhina Katutura. Korutya Aanamibia itaa tula yo itaa fudha sigo oshili ya holokwa puuyeleele moshilongo shawo.

Oshiponokela sho "Reinder" shedhipago moKassinga ("Kassinga Massacre"):

Osha li ongula yeti 4 Mai 1978. Aakwiita yuukoloni yaSouth Africa yomatanga gopevi nopombanda yi ihomateka noondhila dhoo "Mirage" noo "Buccaneer" oya ponokele ontanda yaathiminikilwa Aanamibia moKassinga pwaa na ohenda noshili. Aanamibia oyendji ye thike po 600 - 1,000 mwa kwatelelwa aakulupe naanona, oya dhipagwa. Omathele oya kwatwa nokumonithwa ihuna yopaudhukudhuku oomvula odhindji.

Ndika olya li ethimbo Iigwanahangano tayi tokola omolwonakuyiwa yaNamibia. Oonkundathana odha li dha fala sigo omokatokolitho 435 hoka ando taka lalakanene ehogololo lyopambili nolyaayaye moNamibia. Oomvula 10 dha piti po inaaapu ningwa sha. Oomwenyo otadhi tsikile natango nokukana nombinsi tayi tika. Ngoka e na ondjo nota kateke oshinima otu mu wele ngaa!

8. Edhipago pOonghodi nOmashaka:

Momumvo 1981 pOonghodi Aanamibia 11 yaa na ondjo oya dhipagwa. Omumvo ogwo tuu ngoka muMaalitsa pOmashaka Aanamibia isheve 8 oya dhipagwa kekakunya limwe alike.

9. Edhipago pOshikuku ("Oshikuku Massacre"):

MuMaalitsa 1982 pOshikuku aantu yahetatu mwa kwatelwa uunona oya dhipagwa ku "Walye". Omumvo ngoka wo muJanuali Aanamibia 15 oya dhipagelwa mohango kolundume lwaNamibia.

Edhipago pOshakati (Oshakati Massacre) 7:

Osha li 19 Febuluali 1988, sho Aanamibia yalwe kumwe 27 ya dhipagelwa metungo lyombaanga pOshakati ku "Walye" Shika oshinima oshitalala inashi pumbwa efatululo.

Meme Lavinia, omaso goyendji noombila dhefumviko dhomoshilambo shimwe odhi itsuwa nokukonekiwa momahala gamwe moNamibia. Gamwe inaga itsuwa natango, ihe ondi shi shi otaga ka monika komeho. Omahepeko nomadhipago googumwe noogumwe, omakano nomakanithoyakopo oga ningwa notaga ningwa natango.

Meme Lavinia, owa ti ngaa nee natu fumvike oshili, nonando oya guma aantu yaKalunga? Ano uunake tatu ka tamanekeni onkalo yuulunde moyeyono koshipala shaKalunga naantu, ngele nani hanena? Ngele otatu mwena owala, eimbilo iho-li uuvu ndyono tali ti mokumwena otatu pewa uusama komamanya?

Nandi endulule natango kutya ekondjo Aanamibia ye li mulyo nemanguluko Aanamibia ya hala notaa lalakanene, kali shi lyuuyamba nohokwe.

Tala kepanja tali landula

yeliko lyomazimo. Ihe Aanamibia otaa yuulukwa ethimbo lyombili, lyevululuko, lyokuyola nolyesimaneke lyuuntu.

Lwahugunina meme Lavinia lesa Omukwetu gwaMaalitsa 30, 1988 pepandja 2. Aaleshi amuhe Kalunga kombili nokuuyuni na wilike oondjenda nomadhiladhilo getweni -- twaa loloke twaa dhimbwe onakuziwa nokutaalela onakuyiwa.

Dhi li aniwa mokuti kumwe odhi iuvite omazimba ngaa! Ye ngoka a lya shaKakodhi na tale pombanda. Uuyuni ihau taandelwa oto pi, wo ihau itonywa, oto lungwina. Ohepele naye omuntu Omuthigona naye ohe ehama. Ye Pongo oha loloka. Ihe Oshili oyo ndjoka netegameno olya kola, kutya lwahugunina ayihe otayi ka tanakukila kuuwanawa nokoshili.

S.V.V.Nambala

OMULONGELI TA POPI

Ohatu hepa eshi ndi wete pombinga imwe yoo imwe ohatu pewa eenghono. Ohatu limi, hatu teya, hatu teke, hatu tu, hatu teleke nohatu tyava pamhumbwe. Fyee hatu longo nee oilonga ei twa endela okudja momaumbo ovakulunhu vetu. Ndeleenee ovahona vetu otave tu popi nai pomaushinda nopomanwino, kutya katu na eshi hatu longo nandenande.

Ohatu longo oilonga oyo twa endela okudja momaumbo ovakulunhu vetu. Otwa dja ko omolweemhumbwe, ye naau twe uya okulongela kutya omomaumbo omiti ile omeedolopa, okwa pumbwa omunhu mukwao. Ndele omwedi ohau fi ndele ihatu mono eendjabi pefimbo, fimbo limwe ohadi ka poka nhatu momutine omo to mono ondjabi yoye.

Oku na eemhumbwe daye nohe di yeleke po pefimbo le mu wapalela. Ndele fyee katu na eemhumbwe, eshi ihatu pewa eendjabi detu pefimbo? Keumbo okwa pumbiwa sha, ove mwene owa pumbwa sha. Ohani oya fya ndele ondjabi yoye kai po.

Vakwetu ovalongelwa yandjeni eendjabi dovalongeli veni pefimbo. Ava hamu longo papangelo ohali mu futu pefimbo olo le mu ufila oku mu pa eendjabi deni. Ihali mu pitililifa nandenande. Shaa tuu ndele ino pewa ohani oyo, oko to i keembelewa u ka tangune.

Hano fyee vamwepo ava hatu kala nande eehani nhatu inatu mona ondjabi ndele inatu ka pula ovahona vetu, ofye omalai mbela, ile ovanandunge, ile ovakambeli? Nandi pewe po enyamukulo vali apa. Ohandi i mefudo lohani ile mbali, ndele inandi pewa ondjabi yange.

Otaku tiwa ohandi u ya ndi i hange, vati ngee nde i pewa aishe mokwaaluka ohandi uya ndi likwafe nashike? Eehani odi li nhe, nhatu ndele handi pewa ko ohani imwe. Eemhumbwe odihapu. Ounona vavo otava nu otee neemboloto, vetu ovo ihava nu tee voo va lye eemboloto fyee ava inatu longwa?

Atushe ovaKalunga novovanhu. Epangelo ola pumbwa ovanhu opo va kwafafane aveshe, nohali yandje ofuto yovalongi vayo pefimbo la udafanwa. Ovalongelwa vamwe ohava yandje ondjabi yovanhu vavo pefimbo ndele vamwe ihave shi ningi ngaashi va udafana.

Shaa twa shakene navakwetu (fyee) (ovanailonga) ohatu ambe, hatu sheke ovatekulwa vetu, pamwe

omoipupulu pamwe oshili, shaashi kaku na omunhu ina puka. Neshina eli hali longifwa ngaashi okunyola Ombibeli ohali puka.

Ndele vakwetu elongelokumwe olo tali longo movakulunhu nomounona. Shiwana ngeno kape na efilonghenda ngeno itatu ka xupifwa. Eendjovo daKalunga kadi mo mufye, ngeno da li mo, ngeno hasho tu li eshi. Hano tu lididimikeni okulongela ourwa, okaana omukulupe, opo tu ka xupifweni.

L.T.Hamunyela
Kongo

AAWAMBO OTAA TULWA POMUTENYA

MOWambo omu na aantu oyendji kaaye na iilonga, yamwe yomuyo oomboka ya pita ostid 8 nenge 10. Kungame otashi nikitha ndje oluhodhi mokutala omuntu a pita Std 8 nenge 10 nokuli ndele ke na iilonga. Aantu ayehe mbano oya longwa moskola shi thike pamwe, naayehe otaa ithanwa oya pita nando gumwe e na iitsa yi li pombanda.

Sho hatu yamukulwa kutya kaku na omahala, otashi hala okutya ngu wa hepa hepelela, nenge ota tege omahala ge ke ye po uunake? Kombinga yaantu ye na oonzapo dhi thike pamwe ndele kapu na omahala, naa ninge ngeyi: Gumwe ta longo okuza puJanuali sigo opuJuni. Mukwawo ta zi puJuli sigo Desemba. Nenge otaa longo ayehe, ondjambi sho tayi ya taa topola pokati.

Lahja Ndeshipanda Amakali

OKERSESA MENGELA OMOLWOMEVA (OKUXUPA EENDUNGU)

Water Supply Programme CCN.2-5/8/1988.

Ohatu shiivi ovalitulimo, naavo va hala okulihonga omikalo dipe okukonga nokuxupa eendungu.

Ovakalimo amushe vokOumbalanhu wa Namibia, unene mOwambo. Ileni, Ileni tu ndungikweni, tu pewe omayekele mawa nghene tu na okuxupa eendungu detu, opo tu nweni omeva mawa nomayela yo.

Okersesa ei, otai ka kala mEnongelo lovayakuliongalo mEngela 2-5 Aguste 1988, Kalunga ngeenge e shi hala. Ovaningi vayo, Ovanamibialela, ve na eewino da wana moinima oyo: Etelela oinima ei:—

- Omakumbafa nokambete koye, opo u kofe nawa nawa.
- Okafo nopena opo u didilike sha.
- Olufindo nokayaha opo u lye nawa

Ngenee ove to ya, tu shiivifa divadiva, opo tu ku didilike tete, omo-lweenhele dokunangala.

Denga ongodi oku:
Tel:4; Oshikango
Ile ko Box 116, Oshikango,
9000
kEngela.

Ila, u li taleleko ove mwene!
J.F.Halweendo
Enongelo

UUWINAYI WELAKA LYOSHIMBULU
Ngele to tala oto hala u tye ote sheke Oshimbulu, ashike ondi shi uvitile uudhigu shili, oshoka manga nda li koongundu dhokonima katwa li tu na Oshimbulu okuza ko Std 2 - 5 (ngaashi osho shi li natango).

Ihe sho nda yi kongundu onti 6 otu na Oshimbulu moka nda tseyela oshitya "goeie more." Hela nde shi ihula mo 1980 sho twa li hatu kundwa kaalongi yetu powandaha yongula.

Koongundu dhandje ndhino 6 - 7 onda li ngaa he kopele momutse hewa oshoka iilongwa iishona manga. Ihe ngashingeyi mongundu onti 8 otashi nana nuudhigu oshoka ito vulu u kopele momutse ngaashi ko Std 6 - 7. Oshindji noonkondo notashi piyaganeke omutse.


Ishewe omalaka inaga opala okukopela. Oshili po tashi imbi ndje ndi pewe onzapo yandje Std 8 ya yela nondi uke komeho manga ethimbo li li po. Nampaka otandi indile ngu a kambadhalele shi se po okuza kongundu Std 2 - 5, na kwathe ndje a yululule ko kepaya lyongundu onti 8.

Ondi shi shi ngiika opu na gumwe e na epulo kutya, omuntu ki ilonga iilongwa mbiya itano ye a kale nokakelenge mOshimbulu ashike? Omuntu okwa hala onzapo ya yela. Elaka ito vulu oku li kwatela mongundu yopombanda ndee to li tseye. Oshilongwa oto shi kwatele pombanda ndee oto shi tseye nuupu.

Kehe ngoka u na uyelele melaka lyOshimbulu kutya omolwashike tashi tamekelwa pombanda wu eta, otwe u pumbwa.

Lahja Ndeshipanda Erastus

Etungo lyoondjupa dhofaalama lye egululwa mOnandjokwe



Ongombe ndjika ohayi vulu okugandja ooliteli 20 ongula na 18 ongulohi. Oongombe dholudhi nduka, ohadhi li unene mondjato yomuntu shi vule kelundu, opo yi vule okukala monkalo yoopala

Etungo lyoondjupa dhomahini gofaalama yOngeleki mOnandjokwe, olye egululwe iilonga yalyo 4.7.1988 pambelwa. Etungo olya kwatelela mo eshina lyokutalaleka omahini, ompungulo yomiti dhiimuna nodhoondjuhwa nompungulo yuusila woongombe.

Oondjupa mofaalama ndjoka ohadhi hikwa esiku kehe, pamukalo gwOshiwambo, mwa tulwa omunkunzi. Omu na wo eshina lyokuteleka ehini, niinima mbyoka ohayi landithwa kukehe ngoka a hala. Osikola yaShigambo oya kala neuvathano nofaalama ndjoka oku yi pa omahini. Ngashingeyi ongeshefa yaBanana mOndangwa nayo oya ninga okondraka yomahini pahokololo lyomusamane Sep-po Kalliokoski, omudhiginini gwafaalama.

Ofaalama oya dhikwa kOngeleki nelalakano okusikumudha aakwashigwana ya tameke okupendula po uuteku wiimuna pamukalo gwa putuka. Iilonga oyindji otayi longwa kaakiintu

Ya kundanwa ya mangululwa

Albin Mulyau eti	12.2.1988
Moses Erkki	12.2.1988
Lukas Nghipandulwa	??
Edward H.Haipito	11.3.1988
Leevi M.Protasius	??
Ananias Utoni	??
Heikki Shililfa	??



Aakiintu otaa hiki omahini pamukalo gwOshiwambo. Omagadhi otaga landithwa pofaalama ndjoka

YA DHIGININWA NATANGO NENGE YA KANA

Kotoba 1979	— Festus Nakawa
31. 5.1979	— John Nakawa
5. 5.1980	— Toivo Shilongo
4.10.1980	— Marcelinus Shilongo
Juni 1979	— Matias Ashipembe
4.10.1980	— Modestus Ipinge
18. 9.1978	— Ndeifeka Erastus
18. 9.1978	— Rufus Amukuhu
18. 9.1978	— Mutumbulwa Amukuhu
10. 9.1981	— Kristof I.Shikongo
19. 1.1981	— Filemon Iikela
4.9.1985	— Markus Paulus
28.11.1986	— Ruben Edmund
Kotoba 1987	— Tomas Iipito
8.10.1987	— Mateus Handjaba
3.12.1987	— Shipandeni Mupolo
22.7.1987	— Mateus Mudjanima
7.10.1987	— Jason Angula
17.3.1987	— Natanael Shikongo
27.11.1980	— Andreas Kashikola
27.11.1980	— Teofilus Mateus
27.11.1980	— Mateus Jesaja
29.6.1985	— Amutenja J. Ashipala
3.7.1987	— Abner Shikesho
22.7.1987	— Stefanus Nghifikwa
Juni 1981	— Simeon Nehoya
19.11.1988	— Daniel Israel
20.1.1988	— Natanael Ndatyapo
19.1.1988	— Julius Kapula
20.4.1988	— Paulus Shilule
20.4.1988	— Erasmus Hendjala
20.4.1988	— Salomon Kankono
20.4.1988	— Haidiwa Filemon
20.4.1988	— Aaron Haufiku
20.4.1988	— Frans Hango
14.1.1988	— Gideon Kampulu
19.1.1988	— N.S.Ndatipo
19.1.1988	— Daniel I. Namwandi
20.1.1988	— Delfine Abraham
21.1.1988	— Natanael Stefanus

20.1.1988	— Shipingana Shivute
20.1.1988	— David Haikonda
19.1.1988	— Johannes Nekongo
20.1.1988	— Immanuel Shivolo
20.1.1988	— Salom Uusiku
20.1.1988	— Kandenga Herman
18.1.1988	— Johannes Nande
18.1.1988	— Ndeshaanya shaKanana
18.1.1988	— Jeremia Nandjebo
18.1.1988	— Shaamena Shikungunya
18.1.1988	— Shuudifonya Haufiku
26.12.1987	— Silas (Kamule) Kandenge
Januali 88	— Linus Matongo
17.12.1987	— Josef Dumeni

Ndhindhilika: Ngoka wa tseya gumwe gwaantu mbaka, kutya okwa manguluka, onawa u tseyithile ombelewa yOmukwetu mbala. Tangi kekwa.



pofaalama ndjika, nopahokololo lyomusamane Kalliokoski otashi ende lela nawa.

Sebulon Ekandjo

Oye oshifo shOngeleki Onkwaevangeli paLuther yomuSWA/NAMIBIA.

Ohashi nyanyangidhwa mOshinyanyangidho shOngeleki mOniipa.

Omukuluntu gwoshifo omumbisofi Kleopas Dumeni.

Amushanga gwoshifo omusita Sebulon Ekandjo.

Ondando yOmukwetu muNamibia naSouth Africa R6,00 komumvo.

Palwe muAfrica R10,00 nokombanda yomafuta R14,00 komumvo. Mondhila R17,00.

Oondando nomambesitelo agehe naga tumwe kOmukwetu, Oniipa, P/Bag 2013, Ondangwa, 9000.

ELOC PRINTING PRESS
PRIVATE BAG 2013, TEL. (06762) 11, TELEX 56-3257 WK
SWA/NAMIBIA